

**Tender PFN: Pembangkang Persoal Status NFCorp
mStar Online
Mac 29, 2012
Oleh ARIFFUDDIN ISHAK**

KUALA LUMPUR: Pembangkang mempersoalkan status syarikat NationalFeedlot Corporation (NFCorp) yang bertanggungjawab mengendalikan PusatFidlot Nasional (PFN) selepas kerajaan mengumumkan pembukaan tender bagi mengambil alih projek ternakan lembu berkenaan.

Setiausaha Publisiti DAP, Tony Pua berkata, kerajaan perlu menjelaskan mengenai status kontrak perjanjian antara Kementerian Pertanian dan Industri Asas Tani dengan syarikat milik keluarga Menteri Pembangunan Wanita, Keluarga dan Masyarakat, Datuk Seri Shahrizat itu.

"Dengan pembukaan tender ini, adakah bermakna kementerian telah menamatkan perjanjian dengan NFCorp?"

"Namun sekiranya masih belum ditamatkan, adakah kerajaan sudah melanggar perjanjian yang ditetapkan sebelum ini," katanya pada sidang media di lobi Parlimen di sini, Khamis.

Selain itu Pua turut menggesa Kementerian Kewangan serta Kementerian Pertanian dan Industri Asas Tani menuntut pembayaran balik pinjaman dana awam bernilai RM250 juta daripada NFCorp apabila syarikat berkenaan tidak lagi mengendalikan projek tersebut.

"Kedua-dua kementerian ini perlu menuntut semula pinjaman yang diberikan kepada NFCorp," katanya.

Selasa lalu Menteri Pertanian dan Industri Asas Tani Datuk Seri Noh Omar mengumumkan kerajaan akan membuka tender kepada mana-mana syarikat yang berminat untuk mengambil alih projek ternakan lembu daging PFN.

Pembukaan tender baru itu bagi memastikan projek tersebut dapat diteruskan dan berjalan lancar seperti yang dicadangkan sebelum ini.

Isu PFN berbangkit apabila didakwa telah menyalah guna peruntukan kerajaan sebanyak RM250 juta untuk projek pengeluaran daging.

Hakcipta Terpelihara © 1995-2012 Star Publications (Malaysia) Bhd

Source:

http://mstar.com.my/berita/cerita.asp?file=/2012/3/29/mstar_berita/20120329161843&sec=mstar_berita